

四庫全書

集部

欽定四庫全書

東坡全集卷二十四

宋 蘇軾 撰

詩六十八首

丙子重九二首

三年瘴海上越嶠真我家登山作重九蠻菊秋未花唯
有黃茱根堆壠生坳窠涎酒蘖衆毒酸甜如梨楂何以
侑一罇隣翁餽鼃蛇亦復強取醉歡謠雜悲嗟今年吁
惡歲僵仆如亂麻此會我雖健狂風卷朝霞使我如霜

月孤光挂天涯西湖不欲往墓樹號寒鴉

窮塗不擇友過眼如亂雲餘子誰復數坐閱兩使君共
飲去年堂俯看秋水紋此水與此人相追兩泫泫老去
各休息造物嗟長勤佳哉此令節不惜與子分何以娛
我客游魚在清瀆水師三百指鐵網欲掩羣獲多雖一
快買放尤可欣此樂真不朽明年我歸耘

白鶴峰新居欲成夜過西隣翟秀才二首

林行婆家初閉戶翟夫子舍尚留關連娟缺月黃昏後

縹緲新居紫翠間，繫悶豈無羅帶水。

韓退之云水作青羅帶山為碧玉簪

割愁還有劍鉞山。

柳子厚云海上天峯若劍鉞秋來處處割愁腸皆嶺南詩也

中原

北望無歸日，鄰火村舂自往還。

蠶間畢卓防偷酒，壁後匡衡不點燈。待鑿平江百尺井，要分清茗一壺冰。佐卿恐是歸來鶴，次律寧非過去僧。他日莫尋王粲宅，夢中來往本何曾。

次韻子由所居六詠

堂前種山丹，錯落馬腦盤。堂後種秋菊，碎金收辟寒。草

木如有情慰此芳歲闌幽人正獨樂不知行路難

詩人故多感花發憶兩京石榴有正色玉樹真虛名粲
粲秋菊花卓為霜中英萸照重九纈蔬兩鮮明

幽居有古意義井分西牆誰言三伏熱止須一盃涼先
生坐忍渴羣囂自披猖衆散徐酌飲逡巡味尤長

先生飯土塹無物與劉叉何以娛醉客時喫砌下花井
水分西鄰竹陰借東家蕭然行脚僧一身寄天涯

東齋手種栢今復幾尺長知有桓司馬榛莠為遮藏近

聞南臺松新枝出餘僵年來此懷抱豈復驚凡七

新居已覆瓦無復風雨憂
檜栽與籠竹小詩亦可求
尚欲煩貳師刺山出飛流
應須鑿百尺兩綆載一牛

吳子野絕粒不睡過作詩戲之
芝上人陸道士
皆和予亦次其韻

聊為不死五通仙
終了無生一大緣
獨鶴有聲知半夜

老蠶不食已三眠
憐君解比人間夢

芝有夢齋
子由作銘

許我時

逃醉後禪會與江山
成故事不妨詩酒樂新年

又次韻二守同訪新居二首

數畝蓬蒿古縣陰，曉清快夜堂深也。知卜築非真宅，
聊欲跣趺看此心。聞道攜壺問竒字，更因登木助微音。
相娛北戶江千頃，直下都無地可臨。

此生真欲老牆陰，却掃都忘歲月深。拔薤已觀賢守政，
折蔬聊慰故人心。風流賀監常吳語，憔悴鍾儀獨楚音。
治狀兩邦俱第一，潁川歸去肯重臨。

循守臨行出小鬟復用前韻

學語雛鷺在柳陰臨行呼出翠帷深通家不隔同年面

二守同年家

得路方知異日心趁著春衫游上苑要求國手

教新音嶺梅不用催歸騎截鐙須防舊所臨

循守近為韶

種茶

松間旅生茶已與松俱瘦茨棘尚未容蒙翳爭交構天
公所遺棄百歲仍穉幼紫笋雖不長孤根乃獨壽移栽
白鶴嶺土軟春雨後彌旬得連陰似許晚遂茂能忘流
轉苦戢戢出鳥味未任供白磨且作資摘嗅千團輸大

官百餅街私闢何如此一啜有味出吾囿

白鶴山新居鑿井四十尺遇盤石石盡乃得泉
海國困蒸溽新居利高寒以彼陟降勞易此寢處乾但
苦江路峻常慙汲腰酸矻矻煩四夫硤硤斲層巒彌旬
得尋丈下有青石磐終日但迸火何時見飛瀾豐我粢
與醪利汝椎與鑽山石有時盡我意殊未闌今朝僮僕
喜黃土復可搏晨餅得雪乳莫糞渟冰湍我生類如此
何適不艱難一勺亦天賜曲肱有餘歡

三月二十九日二首

南嶺過雲開紫翠
北江飛雨送淒涼
酒醒夢回春盡日
閉門隱几坐燒香

門外橘花猶的皜
牆頭荔子已爛斑
樹暗草深人靜處
卷簾歌枕卧看山

吾謫海南子由雷州被命即行了不相知至梧
乃聞其尚在藤也且夕當追及作此詩示之
九疑聯緜屬衡湘
蒼梧獨在天一方
孤城吹角煙樹裏

落月未落江蒼茫幽人拊枕坐歎息我行忽至舜所藏
江邊父老能說子白鬚紅頰如君長莫嫌瓊雷隔雲海
聖恩尚許遙相望平生學道真實意豈與窮達俱存亡
天其以我為箕子要使此意留要荒他年誰作輿地志
海南萬里真吾鄉

行瓊儋間肩輿坐睡夢中得句云千山動鱗甲
萬谷酣笙鐘覺而遇清風急雨戲作此數句

四州環一島百洞蟠其中我行西北隅如度月半弓登

高望中原但見積水空此生當安歸四顧真途窮眇觀
大瀛海坐詠談天翁茫茫太倉中一米誰雌雄幽懷忽
破散永嘯來天風千山動鱗甲萬谷酣笙鐘安知非羣
仙鈞天宴未終喜我歸有期舉酒屬青童急雨豈無意
催詩走羣龍夢雲忽變色笑電亦改容應怪東坡老顏
衰語徒工久矣此妙聲不聞蓬萊宮

次前韻寄子由

我少即多難遭回一生中百年不易滿寸寸學強弓老

矣復何言榮辱今兩空泥丸尚一路

古語云十方薄伽梵一路涅槃門

所向餘皆窮似聞崆峒西仇池迎此翁胡為適南海復
駕垂天雄下視九萬里浩浩皆積風回望古合州屬此
琉璃鐘離別何足道我生豈有終渡海十年歸方鏡照
兩童還鄉亦何有暫假壺公龍我眉向我笑錦水為君
容天人巧相勝不獨數子工指點昔遊處蒿萊生故宮

安期生

并引

安期生世知其為仙者也然太史公曰蒯通善齊人安

期生生嘗以策干項羽羽不能用羽欲封此兩人兩人
終不肯受亡去予每讀此未嘗不廢書而歎嗟乎仙者
非斯人而誰為之故意戰國之士如魯連虞卿皆得道
者歟

安期本策士平日交蒯通嘗干重腫子不見隆準公應
如魯仲連抵掌吐長虹難堪踞牀洗寧挹扛鼎雄事既
兩大繆飄然籛遺風乃知經世士出世或乘龍豈比山
澤臞忍饑啖柏松縱使偶不死正堪為僕僮茂陵秋風

客望祀猶蟻逢海上如瓜棗可聞不可逢

夜夢 并引

七月十三日至儋州十餘日矣澹然無一事學道未至
靜極生愁夜夢如此不免以書自怡

夜夢嬉游童子如父師檢責驚走書計功當畢春秋餘
今乃始及桓莊初怛然悸寤心不舒起坐有如挂鈎魚
我生紛紛嬰百緣氣固多習獨此偏棄書事君四十年
仕不顧留書繞纏自視汝與丘孰賢易韋三絕丘猶然

如我當以犀革編

遷居之夕聞鄰舍兒誦書欣然而作

幽居亂蛙黽生理半人禽楚然已可喜況聞弦誦音兒
聲自圓美誰家兩青衿且欣習齊咻未敢笑越吟九齡
起韶石姜子家日南吾道無南北安知不生今海濶尚
挂斗天高欲橫參荆榛短牆缺燈火破屋深引書與相
和置酒仍獨斟可以侑我醉琅然如玉琴

聞子由瘦

僮耳至難得肉食

五日一見花豬肉十日一遇黃雞粥土人頻頻食諸芋

薦以熏鼠燒蝙蝠舊聞蜜唧嘗嘔吐稍近蝦蟇緣習俗

十年京國厭肥瘠日日蒸花壓紅玉從來此腹負將軍

今者固宜安脫粟

俗諺云大將軍食飽捫腹而歎曰我不負汝左右曰將軍固不負此腹此

腹負將軍未嘗出少智慮也

人言天下無正味唧蛆未遽賢麋鹿海

康別駕復何為帽寬帶落驚僮僕相看會作兩臞仙還

鄉定可騎黃鵠

客俎經旬無肉又子由勸不讀書蕭然清坐乃

無一事

病怯鯉鹹不買魚爾來心腹一時虛使君不復憐烏攫
屬國方將掘鼠餘老去獨收人所棄游哉時到物之初
從今免被孫郎笑絳帕蒙頭讀道書

宥老楮

我牆東北隅張王維老穀樹先樗櫟大葉等桑柘沃流
膏馬乳漲墮子楊梅熟胡為尊天地養此不材木蹶之
得輿薪規以種松菊靜言求其用略數得五六膚為蔡

侯紙子入桐君錄黃繒練成素黝面頰作玉灌灑烝生
菌腐餘光吐燭雖無傲霜節幸免狂醜毒孤根信微陋
生理有倚伏投斧為賦詩德怨聊相贖

觀碁 并引

予素不解棋嘗獨游廬山白鶴觀觀中人皆闔戶晝寢
獨聞棋聲於古松流水之間意欣然喜之自爾欲學然
終不解也兒子過乃粗能者儋守張中日從之戲予亦
隅坐竟日不以為厭也

五老峰前白鶴遺趾長松蔭庭風日清美我時獨游不
逢一士誰歟棋者戶外屨二不聞人聲時聞落子紋枰
坐對誰究此味空鈎意釣豈在魴鯉小兒近道剝啄信
指勝固欣然敗亦可喜優哉游哉聊復爾耳

糴米

糴米買束薪百物資之市不緣耕樵得飽食殊少味再
拜請邦君願受一塵地知非笑昨夢食力免內愧春秋
幾時花夏稗忽已穉悵焉撫耒耜誰復識此意

入寺

曳杖入寺門，
輯杖挹世尊。
我是玉堂仙，
謫來海南村。
多生宿業盡，
一氣中夜存。
且隨老鴉起，
饑食扶桑暎。
光圓摩尼珠，
照耀玻璃盆。
來從佛印可，
稍覺魔忙奔。
閒看樹轉午，
坐到鐘鳴昏。
斂收平生心，
耿耿聊自溫。

次韻子由三首

東亭

仙山佛國本同歸，
世路玄關兩背馳。
到處不妨閒卜築，

流年自可數期頤遙知小檻臨塵市定有新松長棘茨
誰道節簷劣容膝海天風雨看紛披

東樓

白髮蒼顏自照盆董生端合是前身獨栖高閣多辭客
為著新書未絕麟小醉易醒風力軟安眠無夢雨聲新
長歌自調真堪笑底處人間是所欣

柳子厚詩云長歌返
故室自謂非所欣

椰子冠

天教日飲欲全絲美酒生林不待儀自漉疎巾邀醉客

更將空殼付冠師

前漢高紀注云薛有作冠師

規摹簡古人爭看簪

導輕安髮不知更著短簷高屋帽東坡何事不違時

次韻子由月季花再生

幽芳本長春暫瘁如蝕月且當付造物未易料枯枿也
知宿根深便作紫笋茁乘時出婉婉為我暖栗冽先生
蚤貴重廟論推英拔如今城東瓜不記台南菽陋居有
遠寄小圃無濶躡還為久處計坐待行年匝

子由明臘年六十

果綴梅枝春盃浮竹葉誰言一萌動已覺萬木活聊將

玉蕊新

世謂此
玫瑰花

插向綸巾折

次韻子由浴罷

理髮千梳淨風晞勝湯沐閉息萬竅通霧散名乾浴頽
然語默喪靜見天地復時令具薪水漫欲濯腰腹陶匠
不可求盆斛何由足

海南無浴器故
常乾浴而已

老雞卧糞土振羽

雙瞑目倦馬驟風沙奮鬣一噴玉垢淨各殊性快愜聊
自沃雲母透蜀紗琉璃瑩蘄竹稍能夢中覺漸使生處
熟楞嚴在牀頭妙偈時仰讀返流歸照性獨立遺所矚

自序
卷二十四
未知仰山禪已就季主卜安心會自得助長毋相督

借前韻賀子由生第四孫斗老

今日散幽憂彈冠及新沐況聞萬里孫已報三日浴朋
來四男子大壯泰臨復開書喜見面未飲春生腹無官

一身輕有子萬事足舉家傳吉夢殊相驚凡目爛爛開

眼電磽磽峙頭玉

李賀詩云頭玉磽磽眉
字翠杜郎生得真男子

但令強筋骨

可以耕衍沃不須富文章端解耗紙竹君歸定何日我

計久已熟長留五車書要使九子讀

吾與子由共
九孫男矣

簞瓢

有內樂軒冕無流矚人言适似我窮達已可卜蚤謀二

頃田莫待八州督

吾前後
典八州

獨覺

瘴霧三年恬不怪反畏北風生體疥朝來縮頸似寒鴉
焰火生薪聊一快紅波翻屋春風起先生默坐春風裏
浮空眼纈散雲霞無數心花發桃李翛然獨覺午窻明
欲覺猶聞醉鼾聲回首向來蕭瑟處也無風雨也無晴

十二月十七日夜坐達曉寄子由

燈燼不挑垂暗蒞爐灰重撥尚餘薰清風欲發鴉翻樹
缺月初升犬吠雲閉眼此心新活計隨身孤影舊知聞
雷州別駕應危坐跨海幽光與子分

謫居三適三首

旦起理髮

安眠海自運浩浩潮黃宮日出露未晞鬱鬱濛濛霜松老
櫛從我久齒疎含清風一洗耳目明習習萬竅通少年
苦嗜腫朝謁常忽忽爬搔未云足已困冠巾重何異服

轅馬沙塵滿風駿凋鞍響珂月實與杵械同解放不可
期枯柳豈易逢誰能書此樂獻與腰金翁

午窻坐睡

蒲團盤兩膝竹几閣雙肘此間道路熟徑到無何有身
心兩不見息息安且久睡蛇本亦無何用鉤與手神凝
疑夜禪體適劇卯酒我生有定數祿盡空餘壽枯楊下
飛花膏澤回衰朽謂我此為覺物至了不受謂我今方
夢此心初不垢非夢亦非覺請問希夷叟

夜卧濯足

長安大雪年束薪抱衾裯雲安市無井斗水寬百憂今
我逃空谷孤城嘯鶴鷓得米如得珠食菜不敢留況有
松風聲釜鬻鳴颼颼瓦盎深及膝時復冷暖投明燈一
爪翦快若鷹辭鞬天低瘴雲重地薄海氣浮土無重脰
藥獨以薪水瘳誰能更包裹冠履裝沐猴

子由生日

上天不難知好惡與我一方其未定間人力破陰隲少

忍待其定報應真可必季氏生而仁觀過見其實端如
柳下惠馬往不三黜天有時而定壽考未易畢兒孫七
男子三子四孫次第皆逢吉遙知設羅門獨掩懸罄室回思
十年事無愧篋中筆但願白髮九年年作生日

以黃子木拄杖為子由生日之壽

靈壽扶孔光菊潭飲伯始雖云閒草木豈樂蒙此恥一
時偶收用千載相瘢痕海南無嘉植野果名黃子堅瘦
多節目天材任操倚嗟我始剪裁世用或緣此貴從老

夫手往配先生几相從歸故山不愧仙人杞

本草枸杞一名仙人杖

過於海舶得邁寄書酒作詩遠和之皆粲然可

觀子由有書相慶也因用其韻賦一篇并寄

諸子姪

我似老牛鞭不動雨滑泥深四蹄重汝如黃犢走却來
海濶山高百程送庶幾門戶有八慈不恨居鄰無二仲
他年汝曹笏滿牀中夜起舞踏破甕會當洗眼看騰躍
莫指癡腹笑空洞譽兒雖是兩翁癖積德已自三世種

豈惟萬一許生還尚恐九十煩珍從六子晨耕簞瓢出
衆婦夜績燈火共春秋古史乃家法詩筆離騷亦時用
但令文字還照世糞土腐餘安足夢

上元夜過赴儋守召獨坐有感

戊寅歲

使君置酒莫相違守舍何妨獨掩扉靜看月窻盤蜥蜴
卧聞風幔落蜘蛛燈花結盡吾猶夢香篆消時汝欲歸
搔首淒涼十年事傳柑歸遺滿朝衣

海南人不作寒食而以上已上冢予攜一盃酒

尋諸生皆出矣獨老符秀才在因與飲至醉
符蓋儋人之安貧守靜者也

老鴉銜肉紙飛灰萬里家山安在哉蒼耳林中太白過
鹿門山下德公回管寧投老終歸去王式當年本不來
記取城南上巳日木棉花落刺桐開

新居

朝陽入北林竹樹散疎影短籬尋丈間寄我無窮境舊
居無一席逐客猶遭屏結茅得茲地翳翳村巷永數朝

風雨涼畦菊發新穎俯仰可卒歲何必謀二頃

五色雀 并引

海南有五色雀常以兩絳者為長進止必隨焉俗謂之
鳳皇云久旱而見輒雨潦則反是吾卜居儋耳城南嘗
一至庭下今日又見之進士黎子雲及其弟威家既去
吾舉酒祝之曰若為吾來者當再集也已而果然乃為

賦詩

粲粲五色羽炎方鳳之徒青黃縞玄服翼衛兩紱朱仁

心知閔農常告雨霽符我窮惟四壁破屋無膽烏惠然
此粲者來集竹與梧鏘鳴如玉佩意欲相嬉娛寂寞兩
黎生食菜真臞儒小圃散春物野桃陳雪膚舉杯得一
笑見此紅鸞雖高情如飛仙未易握粟呼胡為去復來
眷眷豈屬吾回翔天壤間何必懷此都

倦夜

倦枕厭長夜小窻終未明孤村一犬吠殘月幾人行衰
鬢久已白旅懷空自清荒園有絡緯虛織竟何成

用過韻冬至與諸生飲酒

小酒生黎法乾糟瓦盎中芳辛知有毒滴瀝取無窮凍醴
寒初泣春醅暖更饒華夷兩樽合醉笑一歡同里閭我
山北田園震澤東歸期那敢說安訊不曾通鶴鬢驚全
白犀圍尚半紅愁顏解符老壽耳鬪吳翁得穀鵝初飽
亡猫鼠益豐黃薑收土芋蒼耳斫霜叢兒瘦綠儲藥奴
肥為種松頻頻非竊食數數尚乘風河伯方夸若靈媧
自舞馮歸途陷泥淖炬火燎茅蓬膝上王文度家傳張

長公和詩仍醉墨戲海亂羣鴻

符吳皆坐客其餘皆即事實錄也

縱筆三首

寂寂東坡一病翁
白鬚蕭散滿霜風
小兒悞喜朱顏在
一笑那知是酒紅

父老爭看烏角巾
應緣曾現宰官身
谿邊古路三叉口
獨立斜陽數過人

北船不到米如珠
醉飽蕭條半月無
明日東家知祀竈
隻雞斗酒定膾吾

貧家淨掃地

貧家淨掃地貧女好梳頭
下士晚聞道聊以拙自修
扣門有嘉客一飯相邀留
春炊勿草草此客未易媮
慎勿用勞薪感我如薰蕕
德人抱衡石銖黍安可度

次韻子由贈吳子野先生二絕句

馬迹車輪滿四方苦為閉暑小
茆堂仙心欲捉左元放
癡疾還同顧長康

江令蒼苔圍故宅謝家語燕集
華堂先生笑說江南事

祇有青山繞建康

被酒獨行徧至子雲威徽先覺四黎之舍三首

半醒半醉問諸黎竹刺藤梢步步迷但尋牛矢覓歸路
家在牛欄西復西

總角黎家三小童口吹葱葉送迎翁莫作天涯萬里意
谿邊自有舞雩風

符老風情奈老何朱顏減盡鬢絲多投梭每困東鄰女

換扇唯逢春夢婆

是日復見符林秀才說換扇之事

夜燒松明火

歲暮風雨交客舍淒薄寒夜燒松明火照室紅龍鸞快
焰初煌煌碧烟稍團團幽人忽富貴總帳芬椒蘭珠煤
綴屋稍香詣音詣松瀝也
出本草注流銅槃坐看十八公俯仰灰
燼殘齊奴朝爨蠟菜公夜長歎海康無此物燭盡更未

闌

庚辰歲人日作時聞黃河已復北流老臣舊數

論此今斯言乃驗

老去仍栖隔海村夢中時見作詩孫天涯已慣逢人日
歸路猶欣過鬼門三策已應思賈讓孤忠終未赦虞翻
典衣剩買河源米屈指新筍作上元

不用長愁挂月村檳榔生子竹生孫

海南勒竹每節生枝如竹竿大蓋竹

也孫新巢語燕還窺硯舊雨來人不到門春水蘆根看鶴
立夕陽楓葉見鴉翻此生念念隨泡影莫認家山作本
元

庚辰歲正月十二日天門冬酒熟予自漉之且

漉且嘗遂以大醉二首

自撥牀頭一壺雲幽人先已醉濃芬天門冬熟新年喜

麴米春香並舍聞

杜子美詩云間道雲安麴米春蓋酒名也

菜圃漸疎花漠

漠竹扉斜掩雨紛紛擁裘睡覺知何處吹面東風散纈

紋

載酒無人過子雲年來家醞有奇芬醉鄉杳杳誰同夢

睡息齁齁得自聞口業向詩猶小小眼花因酒尚紛紛

點燈更試淮南語汎溢東風有穀紋

淮南子云東風至而酒汎溢許慎注

云酒汎
清酒也

追和戊寅歲上元

春鴻社燕巧相違
白鶴峯頭白板扉
石建方欣洗踰厠
姜龐不解歎蠨蟻
一龕京口嗟春夢
萬炬錢塘憶夜歸
合浦賣珠無復有
當年笑我泣牛衣

題過所畫枯木竹石三首

老可能為竹寫真
小坡今與石傳神
山僧自覺菩提長
心境都將付卧輪

散木支離得自全
交柯蚘蠃欲相纏
不須更說能鳴雁
要以空中得盡年

倦看澁勒暗蠻村
亂棘孤藤束瘴根
唯有長身六君子
依依猶得似淇園

真一酒歌


并引

布算以步五星不如仰觀之捷
吹律以求中聲不如耳
齊之審鈞汞以為藥策
易以候火不如天造之真也
是故神宅空樂出虛
蹈踰者以氣升孰能推是理
以求天

造之藥乎於此有物其名曰真一遠游先生方治此道
不飲不食而飲此酒食此藥居此堂予亦竊其一二故
作真一之歌其詞曰

空中細莖插天芒不生沮澤生陵岡涉閱四氣更六陽
森然不受螟與蝗飛龍御月作秋涼蒼波改色屯雲黃
天旋雷動玉塵香起搜十裂照坐光跣跌牛噉安且詳
動搖天關出瓊漿壬公飛空丁女藏三伏遇井了不嘗
釀為真一和而莊三杯儼如侍君王湛然寂照非楚狂

終身不入無功鄉



東坡全集卷二十四

欽定四庫全書

集部

東坡全集卷二十五
六

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官中書臣牛稔文

謄錄監生臣王邦麟

欽定四庫全書

東坡全集卷二十五

宋 蘇軾 撰

詩八十六首

汲江煎茶

活水還須活火烹

唐人云茶須緩
火烹活火煎

自臨釣石取深清大

瓢貯月歸春壺小杓分江入夜餅茶雨已翻煎處脚松

風忽作瀉時聲枯腸未易禁三盃坐數荒村長短更

予來僮耳得吠狗曰烏嘴甚猛而馴隨予遷合

浦過澄邁泗而濟路人皆驚戲為作此詩

烏喙本海獒幸我為之主食餘已瓠肥終不憂鼎俎畫
馴識賓客夜悍為門戶知我當北還掉尾喜欲舞跳踉
赴僮僕吐舌喘汗雨長橋不肯躡徑度清深浦拍浮似
鶩鴨登岸劇虓虎盜肉亦小疵鞭箠當貫汝再拜謝恩
厚天不遣言語何當寄家書黃耳定乃祖

澄邁驛通潮閣二首

倦客愁聞歸路遙眼明飛閣俯長橋貪看白鷺橫秋浦

不覺青林沒晚潮

餘生欲老海南村
帝遣巫陽招我魂
杳杳天低鶻沒處
青山一髮是中原

洞酌亭詩

并引

瓊山郡東衆泉鬪發然皆冽而不食
丁丑歲六月軾南遷過瓊始得雙泉之甘於城之東北隅以告其人自是汲者常滿泉相去咫尺而異味
庚辰歲六月十七日遷於合浦復過之太守承議郎陸公求泉上之亭名與詩

名之曰洄酌其詩曰

洄酌彼兩泉挹彼注茲一併之中有澠有淄以淪以烹
衆喊莫齊自江徂海浩然無私豈弟君子江海是儀既
味我泉亦濟我詩

六月二十日夜渡海

又見二十八卷

參橫斗轉欲三更苦雨終風也解晴雲散月明誰點綴
天容海色本澄清空餘魯叟乘桴意粗識軒轅奏樂聲
九死南荒吾不恨茲游竒絕冠平生

自雷適廉宿於興廉村淨行院

荒涼海南北佛舍如雞棲忽此榕林中跨空飛拱枅當
門列碧井洗我兩足泥高堂磨新甑洞戶分角圭倒牀
便甘寢鼻息如虹霓僮僕不肯去我為半日稽晨登一
葉舟醉兀十里谿醒來知何處歸路老更迷

廉州龍眼質味殊絕可敵荔支

龍眼與荔支異出同父祖端如柑與橘未易相可否異
哉西海濱琪樹羅玄圃累累似桃李一流膏乳坐疑

星隕空又恐珠還浦圖經未嘗說王食遠莫數獨使皴
皮生弄色映瑯俎蠻荒非汝辱幸免妃子汙

合浦愈上人以詩名嶺外將訪道南嶽留詩壁

上云閒伴孤雲自在飛東坡居士過其精舍
戲和其韻

孤雲出岫豈求伴錫杖凌空自要飛為問庭松尚西指
不知老壯幾年歸

梅聖俞之客歐陽晦夫使工畫茅庵已居其中

一琴橫牀而已曹子方作詩四韻僕和之云
寂寞王子猷回舫剡溪路迢遙戴安道雪夕誰與度倒
披王恭氅半掩袁安戶應調折絃琴自和撚鬚句

歐陽晦夫惠琴枕

中郎不眠仰看屋得此古椽圍尺竹輪囷濩落非笛材
剖作袖琴徽軫足流傳幾處到淵明卧枕綸巾酒新漉
孤鸞別鵠誰復聞鼻息齁齁自成曲

留別廉守

編崔以直猪瑾塗以塗之小餅如嚼月中有酥與飴懸
知合浦人長誦東坡詩好在真一酒為我醉宗資

餅筍詩 并引

庚辰八月二十八日劉幾仲餞飲東坡中觴聞筍簫聲
杳杳若在雲霄間抑揚往返粗中音節徐而察之則出
於雙餅水火相得自然吟嘯蓋食頃乃已坐客驚嘆得
未曾有請作餅筍詩記之

孤松吟風細泠泠獨蠶長縑女媧筍陋哉石鼎逢彌明

丘蚓竅作蒼蠅聲，併中宮商自相賡。昭文無虧亦無成。
東坡醉熟呼不醒，但云作勞吾耳鳴。

歐陽晦夫遺接離琴枕戲作此詩謝之

攜兒過嶺，今七年。晚塗更著黎衣冠，白頭穿林，要藤帽。
赤脚渡水，須花縵，不愁故人驚絕倒。但使俚俗相恬安。
見君合浦，如夢寐，挽鬚握手俱汎瀾。妻縫接離霧縠，細
兒送琴枕，冰徹寒無絃。且寄陶令意，倒載猶作山公看。
我懷汝陰六一老，眉宇秀發如春巒。羽衣鶴氅，古仙伯。

岌岌兩柱扶霜紈至今畫像作此服凜如退之加渥丹
爾來前輩皆鬼錄我亦帶脫巾歌寬作詩頗似六一語
往往亦帶梅公酸

次韻王鬱林

晚塗流落不堪言海上春泥手自翻漢使節空餘皓首
故侯瓜在有顏垣平生多難非天意此去殘年盡主恩
誤辱使君相救拭寧聞老鶴更乘軒

藤州江下夜起對月贈邵道士

江月照我心江水洗我肝端如徑寸珠墮此白玉盤我
心本如此月滿江不湍起舞者誰歟莫作三人看嶠南
瘴毒地有此江月寒乃知天壤間何人不清安牀頭有
白酒益若白露漙獨醉還獨醒夜氣清漫漫仍呼邵道
士取琴月下彈相將乘一葉夜下蒼梧灘

徐元用使君與其子端常邀僕與小兒過同游
東山浮金堂戲作此詩

昔與徐使君共賞錢塘春愛此小天竺時來中聖人松如

遷客老酒似使君醇繁舟藤城下弄月鐔江濱江月夜
夜好雲山朝朝新使君有令子真是石麒麟我子乃散
材有如木輪囷二老白接羅兩郎烏角巾醉卧松下石
扶歸江上津浮橋半没水揭此碧鱗鱗

送鮮于都曹歸灌口舊居

籟盡霜鬚照碧銅依然春雪在長松朝行犀浦催收芋
夜渡繩橋看伏龍莫歎倦游無駟馬要將老健敵千鐘
子雲三世惟身在為向西南說病容

送邵道士彥肅還都嶠

乞得紛紛擾擾身
結茆都嶠與仙隣
少而寡慾顏常好
老不求名語益真
許邁有妻還學道
陶潛無酒亦從人
相隨十日還歸去
萬劫清游結此因

書韓幹二馬

赤髯碧眼老鮮卑
回策如縈獨善騎
赭白紫騮俱絕世
馬中岳湛有妍姿

將至廣州用過韻寄邁迨二子

皇天遣出家臨老乃學道比歸為兒子破戒堪一笑披
雲見天眼回首失海潦蠻唱與黎歌餘音猶杳杳大兒
牧衆穉四歲守孤嶠次子病學醫三折乃粗曉小兒耕
且養得暇為書繞我亦困詩酒去道愈茫渺紛紛何時
定所至皆可老莫學柳儀曹詩書教氓獠亦莫事登陟
谿山有何好安居與我遊閉戶淨洒掃

贈鄭清叟秀才

風濤戰扶胥海賊橫泥子胡為犯二怖博此一笑喜問

君奚所欲欲談仁義耳我才不逮人所有聊足已安能
相付予過聽君誤矣霜風掃瘴毒父自稍清美年來萬
事足所欠惟一死澹欲兩無求滑淨空槩几

和孫叔靜兄弟李端叔唱和

病骨瘦欲折霜髯簡更疎喜聞新國政兼得故人書秉
燭真如夢傾盃不敢餘天涯老兄弟懷抱幾時攄

廣倅蕭大夫借前韻見贈復和答之

坐還粗勝虞早退不如疎垂死初聞道平生誤信書風

濤驚夜半疾病送災餘賴有蕭夫子幽懷得少
攄

心閒詩自放筆老語翻疎贈我皆強韻知君得異
書滔滔沮叟是綽綽孟生餘一笑滄溟側應無憤可攄
王晉叔所藏畫跋尾五首

徐熙杏花

江左風流王謝家盡攜書畫到天涯却因梅雨丹青暗
洗出徐熙落墨花

趙昌四季芍藥

倚竹佳人翠袖長
天寒猶著薄羅裳
揚州近日紅千葉
自是風流時世粧

躑躅

楓林翠壁楚江邊
躑躅千層不忍看
開卷便知歸路近
劍南樵叟為施丹

寒菊

輕肌弱骨散幽葩
真是青裙兩髻丫
便有佳名配黃菊

應緣霜後苦無花

山茶

遊蜂掠盡粉絲黃
落蕊猶收蜜露香
待得春風幾枝在
年來殺菽有飛霜

和黃秀才鑒空閣

明月本自明無心孰為境
挂空如水鑒寫此山河影
我觀大瀛海巨浸與天永
九州居其間無異蛇盤鏡
空水兩無質相照但耿耿
妄云桂兔蟄俗說皆可屏
我遊鑒

空閣缺月正淒冷黃子寒無衣對月句愈警借君方諸
淚一沐管城穎誰言小叢林清絕冠五嶺

韋偃牧馬圖

神工妙技帝所收江都曹韓逝莫留人間畫馬唯常侯
當年為誰掃驂騑至今霜蹏踏長楸圍人困卧沙壠頭
沙苑茫茫疾藜秋風髮霧鬣寒颼颼龍種尚與駑駘遊
長稽短豈豈我羞八鑿六轡非馬謀古來西山與東丘

題靈峯寺壁

靈峯山上寶陀寺白髮東坡又到來前世德雲今我是
依希猶記妙高臺

衆妙堂

廣州何道士

湛然無觀古真人我獨觀此衆妙門夫物芸芸各歸根
衆中得一道乃存道人晨起開東軒趺坐一醉扶桑暎
餘光照我玻璃盆倒射窻兒清而溫欲收月魄餐日魂
我自日月誰使吞

題馮通直明月湖詩後

老行清篇墨未枯
小馮新作語尤殊
呼兒淨洗涵星硯
為子賡歌墮月湖
聞道祥江空抱珥
年來合浦自還珠

請君多釀蓮花酒
準擬王喬下履鳧

南詔有西珥河即古祥柯江也河形

如月抱珥故名之西珥云

次韻鄭介夫二首

一落泥塗迹愈深
尺薪如桂米如金
長庚到曉空陪月
太歲今年合守心
相與齧氈持漢節
何妨振履出商音
孤雲倦鳥空來往
自要閒飛不作霖

一生憂患萃殘年心似驚蠶未易眠海上偶來期汗漫
葦間猶得見延緣良醫自要經三折老將何妨敗兩甄
收取桑榆種梨棗祝君眉壽似增川

昔在九江與蕪伯固唱和其略曰我夢扁舟浮
震澤雪浪橫江千頃白覺來滿眼是廬山倚
天無數開青壁蓋實夢也昨日又夢伯固手
持乳香嬰兒示予覺而思之蓋南華賜物也
豈復與伯固相見於此耶今得來書已在南

華相待數日矣感歎不已故先寄此詩

扁舟震澤定何時滿眼廬山覺又非
春草池塘惠連夢上林鴻雁子卿歸
水香知是曹谿口眼淨同看古佛衣
不向南華結香火此生何處是直徠

次韻韶守狄大夫見贈二首

華髮蕭蕭老遂良

褚河南帖云即日遂良鬚髮盡白蓋謫長沙時也

一身萍挂

海中央無錢種菜為家業有病安心是藥方
才疎正類孔文舉癡絕還同顧長康
萬里歸來空泣血七年供奉

殿西廊

通英閣在延和殿西廊下

森森畫戟擁朱輪坐詠梁公覺有神白傅閒遊空誦句

事見樂天吳郡詩石叙

拾遺窮老敢論親

事見子美贈狄明府詩

東海莫懷

疎受意西風幸免庾公塵為公過嶺傳新唱催發寒梅

一信春

次韻韶倅李通直二首

一篇灑史可書紳莫向長沮更問津老去常憂伴新鬼
歸來且喜是陳人曾陪令尹蒼髯古又見郎君白髮新

回首天涯一惆悵却登梅嶺望楓宸

青山祇在古城隅萬里歸來卜築初會見四山朝鶴駕

更看二李控鯨魚欲從抱朴傳家學應怪中郎得異書

待我丹成馭風去借君瓊佩與霞裾

僕昔為開封幕先公為赤令暇日相

輿論內外丹且出其丹示僕今三十年而見君曲江同遊南華行山水間數日道舊感歎且勸我卜居於舒故詩中皆及之

狄韶州煮蔓菁蘆服羹

我昔在田間寒庖有珍烹常支折脚鼎自煮花蔓菁中

年失此味想像如隔生誰知南嶽老解作東坡羹中有
蘆菹根尚含曉露清勿語貴公子從渠醉羶腥

李伯時畫其弟亮功舊宅圖

樂天蚤退今安有摩詰長閒古亦無五畝自栽池上竹
十年空看輞川圖近聞陶令開三徑應許揚雄借一區
晚歲與君同活計如雲鷺鴨散平湖

贈龍光長老

斫得龍光竹兩竿持歸嶺北萬人看竹中一滴曹溪水

漲起西江十八灘

贈嶺上老人

鶴骨霜髯心已灰
青松合抱手親栽
問翁大庾嶺頭住
曾見南遷幾箇回

贈嶺上梅

梅花開盡百花開
過盡行人君不來
不赴青梅嘗煮酒
要看細雨熟黃梅

予昔過嶺而南題詩龍泉鐘上今復過而北次

前韻

秋風卷黃落朝雨洗綠淨人貪歸路好節近中原正下
嶺獨徐行艱嶮未敢忘遙知叔孫子已致魯諸生

過嶺

暫著南冠不列頭却隨北鴈與歸休平生不作兔三窟
今古何殊貉一丘當日無人送臨賀至今有廟祀潮州
劍關西望七千里乘輿真為玉局游

留題顯聖寺

渺渺疎林集晚鴉，孤村烟火梵王家。幽人自種千頭橘，
遠客來尋百結花。浮石已乾霜後水，焦坑閒試雨前茶。
祇疑歸夢西南去，翠竹江村遶白沙。

予初謫嶺南，過田氏水閣，東南一峯豐下，銳上，
俚人謂雞籠山，予更名獨秀峰。今復過之，戲
留一絕。

倚天巉絕玉浮屠，肯與彭郎作小姑。獨秀江南知有意，
要三二別四三壺。

乞數珠一首贈南禪湜老

從君覓數珠老境仗消遣未敢轉千佛且從千佛轉儒
生推變化乾策數大行道士守玄牝龍虎看舒卷我老
安能為萬劫付一喘默坐閱塵界往來八十反區區我
所寄感縮蠶在繭適從海上回蓬萊又清淺

鬱孤臺

再過虔州
和前韻

吾生如寄耳嶺外亦閒遊贛石三百里寒江尺五流楚
山微有霰越瘴久無秋望斷橫雲嶠魂飛咤雪洲曉鐘

時出寺暮鼓各鳴樓歸路迷千嶂勞生閱百州不隨猿
鶴化甘作賈胡留祇有貂裘在猶堪買釣舟

虔守霍大夫監郡許朝奉見和此詩復次前韻

大邦安靜治小院得閒遊
贛水雨已漲廉泉春水流
同烹貢茗雪一洗瘴茅秋
秋思生尊罍寒衣待橘州
揚雄未有宅王粲且登樓
老景無多日歸心夢幾州
敢因逃酒去端為和詩留
舊篋藏新語清風自滿舟

贈虔州術士謝君

屬國新從海外歸君平且莫下簾帷前生恐是盧行者
後學過呼韓退之死後人傳戒定慧生時宿直斗牛箕
憑君為筭行年看便數生時到死時

虔州景德寺榮師湛然堂

卓然精明念不起兀然灰槁照不滅方定之時慧在定
定慧寂照非兩法妙湛總持不動尊默然直入不二門
語息則默非對語此話要將周易論諸方人人把雷電
不容細看真頭面欲知妙湛與總持更問江東三語掾

和陽行先

用鬱孤
臺韻

室空惟法喜心定有天游
摩詰元無病須洹不入流
苦嫌尋直枉坐待寸田秋
雖未麒麟閣已逃鸚鵡洲
酒醒風動竹夢斷月窺樓
衆謂元德秀自稱陽道州
拔葵終相魯辟穀會封留
用舍俱無碍飄然不繫舟

用數珠韻贈湜長老

嗣宗雖不言叔寶猶理遣
東坡但熟睡一夕一展轉
南遷昔虞翻却掃今馮衍
古佛既手提諸方皆席卷
當年

清隱老鶴瘦龜不喘和我彈丸詩百發亦百反耆年日
凋喪但有犢角蠶時來窺方丈共笑虎毛淺

和猶子遲贈孫志舉

軒裳大爐鞴陶冶一世人從衡落模範誰復甘饑貧可
憐方回癡初不疑嘉賓頗念懷祖黠臆兒與兵姻失身
墮浩渺投老無涯垠回看十年舊誰似數子真孫郎表
獨立霜戟交重圍深居不汝覲豈問親與隣連枝皆秀
傑英氣推伯仁我從海外歸喜及崆峒春新年得異書

西郭有逸民

陽行先以登
真隱訣見借

小孫又過我歡若平生親清

詩五百言句句皆絕倫養火雖未伏要是丹砂銀我家

六男子朴學非時新詩詞各璀璨老語徒周諄願言敦

夙好永與竹林均六子豈可忘從我屢厄陳

南禪長老和詩不已故作六蟲篇答之

鳳凰覽德輝遠引不待遣鷓鴣戀庭宇倏忽來千轉那
將坐井蛙而比談天衍蠹魚著文字槁死猶遭卷老牛
疲耕作見月亦妄喘東坡方三問南禪已五反老人但

目擊侍者方足蠱最後六蟲篇深寄恨語淺

明日南禪和詩不到故重賦數珠篇以督之二

首

未來不可招已過那容遣中間現在心一一風輪轉自
從一生二巧歷莫能衍不如袖手坐六用都懷卷風雷
生聲歎萬竅自號喘詩人思無邪孟子內自反大珠分
一月細綆合兩蠱纍然挂禪牀妙用夫豈淺

朝來取飯化乃是維摩遣全鋒雖未露半藏已曾轉說

有陋裴顏談無笑王行看經聊爾耳遮眼初不卷三咤
故自醒一呷何由喘請歸視故積靜夜珠當反安居三
十年古衲磨山璽持珠尚默坐豈是功用淺

用前韻再和霍大夫

文字先生飲

謂劉執中

江山清獻游典刑傳父老尊俎繼風

流度嶺逢梅雨還家指麥秋自慚鴻鴈侶爭集稻梁洲
野濶橫雙練城堅聳百樓行看鳳尾詔却下虎頭州君
意已吳越我行無去留歸塗應食粥乞米使君舟

用前韻再和許朝奉

高門元世舊客路晚追遊清絕聞詩語疎通豈法流傳
家有衣鉢斷獄盡春秋邂逅陪車馬尋芳謝朓洲淒涼
望鄉國得句仲宣樓恨賦投湘水悲歌祀柳州如何五
字律相與一樽留更約登塵外歸時月滿舟

用前韻再和孫志舉

人衆者勝天天定亦勝人鄧通豈不富郭解安得貧驚
飛賀厦燕走散入幕賓醉眠中山酒夢結南柯姻寵辱

能幾何悲歡浩無垠回視人間世了無一事真洒掃古
玉局香火通帝闈我室思無邪我堂德有隣所至為鄉
里事賢友其仁之子富經術蔚如井大春蛭螿楚南極
淑氣生此民唱高和自寡非我誰當親譬彼嶰谷竹剪
裁待伶倫俗學吁可鄙紙繒配芻銀聊將調癡鬼亦復
爭華新願子事篤實浮言掃譖諄窮通付造物得喪理
本均期子如太倉會當發陳陳

崔文學甲攜文見過蕭然有出塵之姿問之則

孫介夫之甥也故復用前韻賦一篇示志舉

象服盛簪珥豈是邢夫人弊衣破冠履可憐范叔貧君

看崔員外晚就觀國賓當年頗赫赫翁媪爭為姻事見退之

贈崔員外詩

蹭蹬阻風水橫斜挂邊垠青衫映白髮今似梅

子真道存百無害甘守吳市闔自言總角歲慈母為擇

隣邦人驚似舅矯矯惡不仁詩文非他師家法乃富春

豈非空同秀為國產僑民挺然齊魯生近出姬姜親為

文不在多一頌了伯倫清詩要鍛鍊乃得鉛中銀自我

遷嶺外七見槐火新著書已絕筆一默含千諄黃桴和
葦籥天節非人均時時自娛嬉豈為俗子陳

畫車詩二首

何人畫此隻輪車便是當年歌器圖上易下難須審細
左提右挈免疎虞

九衢歌舞頌王明誰恻寒泉獨自清賴有千車能散福
化為膏雨滿重城

虔州呂倚承奉年八十三讀書作詩不已好妝

古今帖貧甚至食不足

揚雄老無子馮衍終不遇不識孔方兄但有靈照女家
藏古今帖墨色照箱管饑來據空案一字不堪煮枯腸
五千卷磊落相撐拄吟為蜩蛩聲時有鳥可句為語里
長者德齒敬已古如翁有幾人薄少可時助

王子直去歲送子由北歸往反百舍今又相逢贛

上戲用舊韻作詩留別

米盡無人典破裘送行萬里一鄒遊解舟又欲攜君去

歸舍聊須與婦謀聞道年來丹伏火不愁老去雪盈頭
剩買山田添鶴口廟堂新拜富民侯

次韻江晦叔二首

人老家何在龍眠雨未驚酒船回太白穉子候淵明幸
與登仙郭同依坐嘯成小樓看月上劇飲到參橫

鐘鼓江南岸歸來夢自驚浮雲世事改孤月此心明雨
已傾盆落詩仍翻水成二江爭送客木杪看橋橫

次韻江晦叔兼呈器之

橫空初不跨鵬翮但覺胡牀步步高

器之言嘗夢飛自覺身與所坐床皆

起空中一枕晝眠春有夢扁舟夜渡海無濤歸來又見顛

茶陸多病仍逢止酒陶笑說南荒底處所祇今榕葉下

亭皋

寒食與器之游南塔寺寂照堂

城南鐘鼓闌清新端為投荒洗瘴塵總是鏡空堂上客
誰為寂照境中人紅英掃地風驚曉綠葉成陰雨洗春
記取明年作寒食杏花曾與此翁隣

器之好談禪不喜游山山中笋出戲語器之可

同參玉版長老作此詩

叢林真百丈法嗣有橫枝

玉版橫枝竹笋也

不怕石頭路來參

玉版師聊憑柏樹子與問籜龍兒
瓦礫猶能說此君那不知

永和清都觀謝道士童顏鬢髮問其年生於丙
子蓋與予同求此詩

鏡湖勅賜老江東未似西歸玉局翁
羈枕未容春夢斷

清都宛在默存中每逢佳境攜兒去試問流年與我同

自笑餘生消底物半篙清漲百灘空

子與劉器之同發
虔州江水忽清漲

大餘贛石三百里無一見者至永和
器之解舟先去予獨游清都作此詩

贈詩僧道通

雄豪而妙苦而腴祇有琴聰與蜜殊

錢塘僧思聰總角
善琴後捨琴而學

詩復素詩而學道其詩似皎然而加雄故安州僧仲
殊詩敏捷立成而工妙絕人遠甚殊辟殺常啖蜜語

帶烟霞從古少

李太白云他人之文如
山無烟霞春無草木

氣含蔬笋到公

無謂無酸
餽氣也

香林乍喜聞簷蔔古井惟愁斷轆轤為報韓

公莫輕許從今島可是詩奴

張競辰永康所居萬卷堂

君家四壁如相如卷藏天祿吞石渠豈惟鄴侯三萬軸
家有世南行秘書兒童拍手笑何事笑人空腹談經義
未許中郎得異書且共揚雄說竒字清江縈出碧玉環
下有老龍千古閒知君好事家有酒化為老人夜扣關
留侯之孫書滿腹玉函寶方何用讀濠梁空復五車多
地上從來一篇足

劉壯與長官是是堂

閒燕言仁義是非安可無非非義之屬是是仁之徒非
非近乎訕是是近乎諛當為感麟翁善惡分錙銖抑為
阮嗣宗臧否兩含糊劉君有家學三世道益孤陳古以
刺今紬史行天誅皎如大明鏡百陋逢一姝鶚立時四
顧何由擾羣狐作堂名是是自說行坦途孜孜稱善人
不善自遠徂願君置座右此語禹所謨

予昔作壺中九華詩其後八年復過湖口則石

已為好事者取去乃和前韻以自解云

江邊陣馬走千峰問訊方知冀北空尤物已隨清夢斷

劉夢得以九筆為造物一尤物

真形猶在畫圖中

道藏有五嶽真形圖

歸來晚歲

同元亮却掃何人伴敬通賴有銅盆修石供仇池玉色

自璉瓏

家有銅盆貯仇池石正綠色有洞水達背予又嘗以怪石供佛印師作怪石供一篇

次韻郭功甫二首

蚤知臭腐即神奇海北天南總是歸九萬里風安稅駕

雲鵬今悔不卑飛

可憐倦鳥不知時
空羨騎鯨得所歸
玉局西南天一角
萬人沙苑看孤飛

次韻法芝舉舊詩

春來何處不歸鴻
非復羸牛踏舊蹤
但願老師真似月
誰家甕裏不相逢

次韻贈清涼長老

過淮入洛地多塵
舉扇西風欲汗人
但怪雲山不改色
豈知江月解分身
安心有道年顏好
遇物無情句法新

送我長蘆舟一葉笑着雪浪滿衣巾

睡起聞米元章到東園送麥門冬飲子

一枕清風直萬錢無人肯買北窗眠
開心暖胃門冬飲知是東坡手自煎

夢中作寄朱行中

舜不作六器誰知貴與璫
哀哉楚狂士抱璞號空山
相如起腕柱頭壁相與還
何如鄭子產有禮國自閑
雖微韓宣子鄙夫亦辭環
至今不貪寶凜然照塵寰

答徑山琳長老

與君皆丙子各已三萬日一日一千偈電往那容詰大
患緣有身無身則無疾平生笑羅什神呪真浪出

東坡全集卷二十五

欽定四庫全書

東坡全集卷二十六

宋 蘇軾 撰

詩七十七首

靈上訪道人不過

花光紅滿欄草色綠無岸不逢青眼人長歌白石澗

送淡公二首

燕本冰雪骨越淡蓮花風五言雙寶刀聯響高飛鴻翰
苑錢舍人詩韻鏗雷公識本不識淡仰詠嗟無窮清韻

生物表朗玉傾壺中常於冷竹坐相語道意沖崧洛興
不薄稽江事難同明日若不來我作黃石翁何以兀其
心為君學虛空

坐重青草公意合滄海濱渺渺獨見水悠悠不聞人鏡
浪洗手淥剡花入心春雖然防外觸眼前遶衣新行當
譯文字慰此吟慙慙

上韓持國

韓氏三虎秉樞極中有一虎似偉節端居隱几學無心

夙駕入朝常正色
犯時獨行太嶮巖
回天不忌真藥石
輦致歸來荷二聖
推排使至有衆力
吾儕小人但飽飯
不有君子何能國
西湖醉卧春水船
如何為人作豐年

送別

鴨頭春水濃如染
水面桃花弄春臉
哀翁送客水邊行
沙襯馬蹄烏帽點
昂頭問客幾時歸
客道秋風落葉飛
繫馬綠楊開口笑
傍山依約見斜暉

琴枕

清眸作金徽素齒為玉軫響泉竟何用金帶常苦窘攔
斑漬珠淚宛轉堆雲鬢君若安七絃應彈卓氏引

黃州

南山一尺雪雪盡山蒼然澗谷深自暖梅花應已繁使
君厭騎從車馬留山前行歌招野叟共步青林間長松
得高蔭盤石堪醉眠祇樂聽山鳥攜琴寫幽泉愛之欲
忘返但苦世俗牽歸來始覺遠明月高峰顛

常山贈劉鉉

劉侯年少日駿馬拊便面援弓鴈自落不待白羽貫

古風

精神洞元化白日昇高旻俯仰凌倒景龍行逸如神半
道過紫府弭節聊逡巡金牀設寶几璀璨明月珍仙者
二三子眷然骨肉親飲我霞石盃放盃恍如春遂朝玉
虛上冠劍班列真無端拜失儀放棄令自新雲霄難遽
返下土多埃塵淮南守天庖嗟我復何人

遊杭州山

山平村鳩迷野寺鐘相答晚陰失林莽

一作

落日猶在

塔行招兩社僧共步青山月送客渡石橋迎客出林樾

幽尋本真性往事聽徐說錢王方壯年此邦事輕俠鄉
人鄙貧賤異類識英傑立石像興王遺址今岌業功勳
三吳定富貴四海甲歸來父老藏崇高畏傾壓詩人工
譏病此欲恣挑抉流傳後世人談笑資口舌是非今已
矣興廢何倉卒持歸問禪翁笑指浮漚沒

遊三游洞遊洞之日有亭吏乞詩既為留三絕

句於洞之石壁明日至峽州吏又至意若未
足乃復以此授之

一徑遶山翠紫紆去似蛇忽驚溪水急爭看洞門呀滑
磴攀秋蔓飛橋踏古槎三扉迎北吹一穴向西斜歎息
煙雲去追思歲月遐唐人昔未到古俗此為家洞暖無
風雪山深富鹿豨相逢衣盡草環坐髻應髻竈突依巖
黑樽壘就石窪洪荒無傳記想像在犧媯此事今安有
遺蹤我獨嗟山翁勸留句強為寫槎牙

穆父新涼

家居妻兒號出仕猿鶴怨未能逐什一安敢搏九萬常
恐樗櫟身坐纏冠蓋蔓受恩如負債粗報乃焚券但知
眠牛衣寧免刺虎圈清風來既雨新稻香可飯紫螯應
已肥白酒誰能勸君今崔蔡手政比張趙健三公行可
致一語自先獻幸推江湖心適我魚鳥願

無題

引手攀紅櫻紅櫻落如線仰首看紅日紅日走如箭年

光與時景頃刻互哀變何當血肉身安得常強健人心
苦執迷富貴憂貧賤憂色常在眉歡容不上面吾今頭
半白把鏡非不見惟應花下盃更待他人勸

十一月三日與幾先自竹西來訪慶老不見獨
與君卿供奉蟾知客東閣道話久之惠州追

錄

卷卷長廊走黃葉席簾垂地香烟歇主人待來終不來
火紅銷盡灰如雪

古意

兒曹鞭笞學官府，翁憐兒癡旁笑侮。
翁出坐曹鞭復呵，賢於羣兒能幾何。
兒曹鞭人以為戲，公怒鞭人血流地。
等為戲劇誰能先，我笑謂翁兒更賢。

用定國韻贈二十姪震

衡門老苔蘚，行柏千兵屯。
樽邀落日未對鳥，鳥言清風舉。
吹籟散亂書帙翻，傳呼一何急。
人馬從車奔，貧居少賓客。
隣婦窺籬藩，牆頭過春酒。
綠泛田家盆，比來伏

青蒲坐捉白獸樽
王猷修潤色亦有簿領煩朝廷貴
二陸屢聞天語溫
猶能整筆陣媿我非韓孫

聞潮陽吳子野出家

子昔少年日氣蓋里閭
俠自言似劇孟叩門知緩急千金已散盡
白首空四壁烈士歎暮年老驥悲伏櫪
妻孥真弊屣脫棄何足惜四大猶幻座衣冠矧外物一朝發無上顧老靈山宅
世事子如何禪心久空寂世間出世間此道無兩得故應入枯槁習氣要除拂丈夫生豈易

趣舍志匪石當為師子吼佛法無南北

補唐文宗柳公權聯句

并引

宋玉對楚王此獨大王之雄風也庶人安得而共之譏
楚王知己而不知人也柳公權小子與文宗聯句有美
而無箴故為足成其篇云

人皆苦炎熱我愛夏日長薰風自南來殿閣生微涼一
為居所移苦樂永相忘願言均此施清陰分四方

食檳榔

月照無枝林夜棟立萬礎眇眇雲間扇蔭此九月暑上
有垂房子下繞絳刺禦風欺紫鳳卵雨暗蒼龍乳裂包
一墮地還以皮自煮北客初未諳勸食俗難阻中虛畏
泄氣始嚼或半吐吸津得微甘著齒隨亦苦面目太嚴
冷滋味絕媚媼誅彭勳可策推轂勇宜賈瘴風作堅頑
導利時有補藥儲固可爾果錄詎用許先生失膏梁便
腹委敗鼓日啖過一粒腸胃為所侮蟄雷殷臍腎藜藿
腐亭午書燈看膏盡缸漏歷歷數老眼怕少睡竟使赤

背努渴思梅林噉饑念黃獨舉奈何農經中收此困羈
旅牛舌不餉人一斛肯多與乃知見本偏但可酬惡語

古離別送蘇伯固

三度別君來此別真遲暮白盡老髭鬚明日淮南去酒
罷月隨人淚濕花如霧後夜逐君還夢遶湖邊

一作路
江南

次韻魯直書伯時畫王摩詰

前身陶彭澤後身韋蘇州欲覓王右丞還向五字求詩
人與畫手蘭菊芳春秋又恐兩皆是分身來入流

雷州八首

白髮坐鈞黨南遷
瀕海州灌園以餬口
身自雜蒼頭籬
落秋暑中碧花蔓牽牛
誰知把鋤人
舊日東陵侯

荔子無幾何
黃柑遽如許
遷臣不惜日
恣意移寒暑
層巢俯雲木
信美非吾土
草芳自有時
鷓鴣何關汝

下居近流水
小巢依嶺岑
終日數椽間
但聞鳥遺音
爐香入幽夢
海月明孤斟
鷓鴣一枝足
所恨非故林

培塿無松柏
駕言此焉游
讀書與意會
却掃可忘憂
尺

蝮以時屈其伸亦非求得歸良不惡未歸且淹留

粵嶺風俗殊有疾時勿藥束帶趨房祀用史巫紛若絃
歌薦繭粟奴至洽觴酌呻吟殊未央更把鷄骨灼

粵女市無常所至輒成區一日三四遷處處售鰕魚青
裙脚不鞮臭味猿與狙孰云風土惡白洲生綠珠

海康臘已酉不論冬孟仲殺牛撾鼓祭城郭為傾動雖
非堯頌歷自我先人用苦笑荆楚人嘉平臘雲夢

舊時日南郡野女出成羣此去尚應遠東風已如雲

氓託絲布相就通殷勤
可憐秋胡子不遇卓文君

妬佳月

狂雲妬佳月怒飛千里黑
佳月了不嗔曾何汗潔白
爰有謫仙人舉酒為三客
今夕偶不見沈瀾念風伯
毋煩風伯來彼也易滅
沒支頤少待之寒空淨
無迹粲粲黃金盤
獨照一天碧玉繩
慘無輝玉露洗秋色
浩瀚玻璃瑣和光
入胸臆使我能永延
約君為莫逆

追和沈遼項贈南華詩

善哉彼上人了知明鏡臺歡然不我厭肯致遠公材莞爾無心雲胡為出岫來一堂安寂滅卒歲局蒼苔

夢雪

殘盃失春溫破被生夜悄開門千山白俯仰同一照雖時出圭角固自絕瑕竅兒童勿驚怪調汝得一笑

雪林硯屏率魯直同賦

西山無時春巉巖鎖頑陰分明倚天壁點綴無風林物固為人出興誰於此深窮竒真自蠹詩句且娛心

南屏謙師妙於茶事自云得之於心應之於手
非可以言傳學到者十月二十七日聞軾遊
壽星寺遠來設茶作此詩贈之

道人曉出南屏山來試點茶三昧手忽驚午琰兔毫斑
打作春甕鵝兒酒天台乳花世不見玉川風腋今安有
東坡有意續茶經會使老謙名不朽

申王畫馬圖

天寶諸王愛名馬千金爭致華軒下當時不獨玉花驄

飛電流雲絕瀟灑兩坊歧薛寧與申憑陵內廡多清新
肉駿汗血盡龍種紫袍玉帶真人驪山射獵包原隰
御前急詔穿圍入揚鞭一蹙破霜蹄萬騎如風不能及

雁飛兔走驚弦開翠華按轡從天回五家錦繡變一作遍

山谷百里舄珥遺纖埃青驪蜀棧兩一作西超忽高準濃

蛾散荆棘回首追風趁日飛一作首茫連天鳥自飛五陵佳氣春

蕭瑟

奉和成伯大雨中會客解嘲

樂事難并真實語坐排用意多乖誤興來取次或成懽
瓦鉤却勝黃金注我生禍患久不擇肯為一時風雨阻
天公變化豈有常明月行看照歸路

和公濟飲湖上

昨夜醉歸還獨寢曉來宿雨鳴孤枕扁舟小棹截湖來
正見青山駁雲錦須知老人興不淺莫學公榮不共飲
與君歌鼓樂豐年喚取千夫食陳廩

贈僧

道人自嫌三世將棄家十年今始壯玉骨猶含富貴餘
漆瞳已照人天上去年相見古長干衆中矯矯如翔鸞
今年過我江西寺病瘦已作霜松寒朱顏不辨供歲月
風中蒿火湯中雪好問君家面黃翁乞得摩尼照生滅
莫學王郎與支遁臂鷹走馬憐神駿還君圖畫君自收
不如木人騎土牛

周教授索枸杞因以詩贈錄呈廣倅蕭大夫

鄴侯藏書手不觸嗟我嗜書終日讀短檠照字細如毛

怪底眼花懸兩目扶衰賴有王母杖名字於今掛仙錄
荒城古塹草露寒碧葉叢低紅菽粟春根夏苗秋著子
盡付天隨恥充腹蘭傷桂折緣有用爾獨何損丹其族
贈君慎勿比薏苡採之終日不盈掬外澤中乾非爾儔
歛藏更借秋陽曝雞壅桔梗一稱帝董也雖尊等臣僕
時復論功不汝遺異時謹事東籬菊

次韻董夷仲茶磨

前人初用茗飲時煮之無問葉與骨寢窮厥味白始用

復計其初礮方出計盡功極至於磨信哉智者能創物
破槽折杵向牆角亦其遭遇有伸屈歲久講求知處所
佳者出自衡山窟巴蜀石工強鑄鑿理疎性軟良可吐
予家江陵遠莫致塵土何人為披拂

送公為遊淮南

負米萬里緣其親運甓無度憂其身讀書莫學流麥士
挾策莫比亡羊人廼翁辛苦到白首汝今強勉當青春
昔時管鮑以君霸此兩士賈寧非貧

謝蘇自之惠酒

高士例須憐麴蘖此語嘗聞退之說我今有說殆不然
麴蘖未必高士憐醉者墜車莊生言全酒未若全於天
達人本自不虧缺何暇更求全處全景山沈迷阮籍傲
畢卓盜竊劉伶顛貪狂嗜怪無足取世俗喜異矜其賢
杜陵詩客尤可笑羅列八子參羣仙流涎露頂置不說
為問底處能逃禪我今不飲非不飲心月皎皎長孤圓
有時客至亦為酌琴雖未去聊忘絃吾宗先生有真意

百里雙巒遠將寄且言不飲固亦高舉世皆同吾獨異
不如同異兩俱冥得鹿亡羊等嬉戲決須飲此勿復辭
何用區區較醒醉

西山戲題武昌王居士

并引

予往在武昌西山九曲亭上有題一句玄鴻橫號黃榭
峴九曲亭即吳王峴山一山皆榭葉其旁即元結陂湖
也荷花極盛因為對云皓鶴下浴紅荷湖坐客皆笑同

請賦此詩

江干高居堅關扃健耕躬稼角掛經篙竿繫舸菰茭隔
笳鼓過軍鷄狗驚解襟顧景各箕踞擊劍賡歌幾舉觥
荆筭供膾愧攬脰乾鍋更夏甘瓜羹

戲和正甫一字韻

故居劍閣隔錦官柑果薑蕨交荆管竒孤甘掛汲古綆
僥覲敢揭鈎金竿已歸耕稼供藁桔公貴幹蠶高中冠
改更句格各蹇吃姑因狡獪加間關

王方平謂麻姑云
姑固少年吾老矣

不復作此狡
獪變化也

池上二首

小池新鑿會天雨一部鼓吹從何來有蟾正碧亂草色
時洄出沒東南隈井幹跳梁亦足樂洞庭魚龍何有哉
能歌德聲莫入月清池與爾俱忘回

不作太白夢日邊還同樂天賦池上池上新年有荷葉
細雨魚兒噏輕浪男兒學易不應舉幽人一友吾得尚
此池便可當長江欲榜茅齋來蕩漾

贈仲素寺丞致仕歸隱潛山

潛山隱君七十四紺瞳綠髮方謝事腹中靈液變丹砂
江上幽居連福地彭城為我駐三日明月滿舟同一醉
丹書細字口傳訣顧我沉迷真棄耳年來四十髮蒼蒼
始欲求方救憔悴他年若訪潛山居慎勿逃人改名字
魯直以詩餽雙井茶次韻為謝

江夏無雙種竒茗汝陰六一誇新書磨成不敢付僮僕
自看湯雪生璣珠列仙之儒瘠不腴只有病渴同相如
明年我欲東南去畫舫何妨宿太湖

歸田錄草茶以雙井為第一畫舫宿

太湖北渚
貢茶故事

揚州以土物寄少游

鮮鯽經年秘醞醱團臍紫蟹脂填腹後春尊茁活如酥
先社薑芽肥勝肉烏子累累何足道點綴盤餐亦時欲
淮南風俗事瓶罌方法相傳竟留蓄且同千里寄鵝毛
何用孜孜飲麋鹿

贈曇秀

白雲出山初無心棲鳥何必戀山林道人偶愛山水故

縱步不知湖嶺深空巖已禮百千相曹溪更欲瞻遺像
要知水味孰冷暖始信夢時非幻妄袖中忽出貝葉書
中有璧月綴星珠人間勝絕略已遍匡廬南嶺并西湖
西湖北望三千里大堤冉冉橫秋水誦師佳句說南屏
瘴雲應逐秋風靡胡為只作十日歡杖策復尋歸路難
留師筍屨不足道悵望荔子何時丹

再過泗上二首

眼明初見淮南樹十客相逢九吳語旅程已付夜帆風

客睡不妨背船雨黃柑紫蟹見江海紅稻白魚飽兒女
慇懃買酒謝船師千里勞君勤轉櫓

繫舟淮北雨折軸繫舟淮南風斷橋客行有期日月疾
歲事欲晚霜雪驕山根浪頭作雷吼縮手敢試舟師篙
不用燃犀照幽怪要須拔劍斬長蛟

贈李兕彥威秀才

魏王大瓠實五石種成濩落將安適可憐公子持十牛
海上三年竟何得先生少負不羈才從軍數到單于臺

天山直欲三箭取白衣將軍何人哉夜逢怪石曾飲羽
戲中戟枝何足數誓將馬革裹屍還肯學班超苦兒女
封侯衛霍知幾許老矣先生困羈旅酒酣聊復說平生
結襪猶堪一再鼓棄書捐劍學萬人紈袴儒冠皆誤身
窮途政似不龜手與世羞為西子顰如今惟有談天口
雲夢胸中吞八九世間萬事寄黃梁且與先生說烏有

次韻謝子高讀淵明傳

枯木嵌空微黯淡古器雖在無古絃袖中正有南風手

誰為聽之誰為傳風流豈落正始後甲子不數義熙前
一山黃菊平生事無酒令人意缺然

龐公

襄陽龐公少檢束白髮不髡亦不俗世所奔趨我獨棄
我已有餘彼不足鹿門有月樹下行虎溪無風舟上宿
不識當年捕魚客但愛長康畫金粟杜口如今不復言
龐公為人不曲局東西有人問老翁為道明燈照華屋
五言七言正兒戲三行五行亦偶爾我性不飲只解醉

正如春風弄羣卉四十年來同幻事老去何須別愚智
古人不仕亦不滅我今不作亦不止寄語悠悠世上人
浪生浪死一埃塵洗墨無池筆無象脚爾作戲悅吾神

送呂行甫司門倅河陽

結交不在久傾蓋如平生識子今幾日送別亦有情子
生公相家高義久崢嶸天才既超詣世故亦屢更譬如
追風驥豈免羈與纓念我山中人久與麋鹿并誤出掛
世網舉動俗所驚歸田雖未果已覺去就輕河陽豈云

遠出處恐異程便當從此別有酒無徒傾

食雉

雄雉曳脩尾驚飛向日斜空中紛格鬪綵羽落如花喧
呼勇不顧投網復誰嗟百錢得一雙新味時所佳烹煎
雜雞鶩爪距漫槎牙誰知化為蜃海上落飛鷗

雙鳧觀

在葉縣

王喬古仙子時出觀人寰常為漢郎吏厭世去無還雙
鳧偶為戲聊以驚世頑不然神仙迹羅網安能攀紛紛

塵埃中銅印紆青綸安知無隱者竊笑彼愚奸

郭綸

綸本河西弓箭手屢戰有功不賞自黎州都監官滿貧不能歸今權嘉州監稅

河西猛士無人識日暮津亭閱過船
路人但覺驄馬瘦不知鐵槩大如椽
因言西方久不戰截髮願作萬騎先
我當憑軾與寓目看君飛矢射蠻羶

初發嘉州

朝發鼓闐闐西風獵畫旃故鄉飄已遠
往意浩無邊錦水細不見蠻江清更鮮
奔騰過佛脚曠蕩造平川野市

有禪客釣臺尋暮烟相期定先到久立水潺潺

是日期
鄉僧宗

一會別釣

魚臺下

捷為王氏書樓

樹林幽翠滿山谷樓觀突兀起江濱云是昔人藏書處
磊落萬卷今生塵江邊日出紅霧散綺窻畫閣青氛氳
山猿悲嘯谷泉響野鳥嘒夏巘花春借問生人今何在
被甲遠戍長苦辛先登搏戰事斬級區區何者為三墳
書生古亦有戰陣葛巾羽扇揮三軍古人不見悲世俗

回首蒼山空白雲

過宜賓見夷中亂山

江寒晴不知遠見山上日朦朧含高峰晃蕩射峭壁橫
雲忽飄散翠樹紛歷歷行人挹孤光飛鳥投遠碧蠻荒
誰復愛穠秀安可適豈無避世士高隱鍊精魄誰能從
之遊路有豺虎迹

夜泊牛口

日落江霧生繫舟宿牛口居民偶相聚三四依古柳負

薪出深谷見客喜且售煮蔬為夜餐安識肉與酒朔風
吹茅屋破壁見星斗兒女自咿嘵亦足樂且久人生本
無事苦為世味誘富貴耀吾前貧賤獨難守誰知深山
子甘與麋鹿友置身落蠻荒生意不自陋今子獨何者
汲汲強奔走

牛口見月

掩窻寂已睡月脚垂孤光披衣起周覽飛露洒我裳山
川同一色浩若涉大荒幽懷耿不寐四顧獨彷徨忽憶

丙申年京邑大雨霽蔡河中夜決橫浸國南方車馬無
復見紛紛操棹郎新秋忽已晴九陌尚汪洋龍津觀夜
市燈火亦煌煌新月皎如晝疎星弄寒芒不知京國喧
是謂江湖鄉今來牛口渚見月重淒涼卻思舊遊處滿
陌沙塵黃

舟中聽大人彈琴

彈琴江浦夜漏永歛衽竊聽獨激昂風松瀑布已清絕
更愛玉佩聲琅璫自從鄭衛亂雅樂古器殘缺世已忘

千年寥落獨琴在有如老仙不死閱興亡世人不容獨
反古強以新曲求鏗鏘微音淡弄忽變轉數聲浮脆如
笙簧無情枯木今尚爾何況古意墮渺茫江空月出人
響絕夜闌更請彈文王

泊南牛口期任遵聖長官到晚不及見復來

江上有微徑深榛烟雨埋崎嶇欲取別不見又重來下
馬未及語固已慰長懷江湖涉浩渺安得與之偕

江上看山

船上看山如走馬倏忽過去數百羣前山槎牙忽變態
後嶺雜還如驚奔仰看微逕斜繚繞上有行人高縹緲
舟中舉手欲與言孤帆南去如飛鳥

留題仙都觀

山前江水流浩浩山上蒼蒼松柏老舟中行客去紛紛
古今換易如秋草空山樓觀何崢嶸真人王遠陰長生
飛符御氣朝百靈悟道不復誦黃庭龍車虎駕來下迎
去如旋風搏紫清真人厭世不回顧世間生死如朝暮

學仙度世豈無人餐霞絕粒長辛苦安得獨從逍遙君
冷然乘風駕浮雲超世無有我獨行

屈原塔

在忠州原不當有塔於此
意者後人追思故為作之

楚人悲屈原千歲意未歇精魂飄何處父老空哽咽至
今滄江上投飯救饑渴遺風成競渡猿叫楚山裂屈原
古壯士就死意甚烈世俗安得知眷眷不忍決南竇舊
屬楚山上有遺塔應是奉佛人恐子就淪滅此事雖無
憑此意固已切古人誰不死何必較考折名聲實無窮

富貴亦暫熱大夫知此理所以持死節

西山詩和者三十餘人再次前韻為謝

朱顏發過如春醅胸中梨棗初未栽丹砂未易掃白髮
赤松却欲參黃梅寒溪本自遠公社白蓮翠竹依崔嵬
當時石泉照金像神光夜發如五臺飲泉鑒面得真意
坐視萬物皆浮埃欲收暮景返田里遠溯江水窮離堆
還朝豈獨羞老病自歎才盡傾空壘諸公渠渠若夏屋
吞吐風月清隅隈我如廢井久不食古甃缺落生陰苔

數詩往復相感發汲新除舊寒光開遙知二月春江闊
雪浪倒卷雲峯摧石中無聲水亦靜云何解轉空山雷
欲就諸公評此句一作語要識憂喜何從來願求南宗一
勺水往與屈賈湔餘哀

新灘

扁舟轉山曲未至已先驚白浪橫江起槎牙似雪城
番從高來一一投澗坑大魚不能上暴鬣一作腮灘下橫
小魚散復合澆澗如遭烹鷓鴣不敢下飛過兩翅輕白

鷺誇瘦捷插脚還歌傾區區舟上人薄技安敢呈只應
灘頭廟賴此牛酒盈

新灘阻風

北風吹寒江來自兩山口初聞似搖扇漸覺平沙走飛
雲滿崑谷舞電穿窻牖灘下三日留識盡灘一作前叟

孤舟倦鴟軋短纜困牽揉嘗聞不終朝今此何其久只
應留遠人此意固亦厚吾今幸無事閉戶為飲酒

昭君村

昭君本楚人艷色照江水楚人不敢娶謂是漢妃

一作家

子誰知去鄉國萬里為胡鬼人言生女作門楣昭君當時憂色衰古來人事盡如此反覆縱橫安可知

黃牛廟

江邊石壁高無路上有黃牛不服箱廟前行客拜且舞
擊鼓吹簫屠白羊山下耕牛苦磽确兩角磨崖四蹄濕
青芻半束長苦饑仰看黃牛安可及

蝦蟇培

墓背似覆盂，巖頤如偃月。謂是月中墓，開口吐月液。根
源來甚遠，百尺蒼崖裂。當時龍破山，此水隨龍出入江。
江水濁猶作深碧，色稟受苦潔清。獨與凡水隔，豈惟煮
茶好釀酒，應無敵。

留題峽州甘泉寺

姜詩
故居

輕舟橫江來，弔古悲純孝。逶迤尋遠迹，婉孌見遺貌。清
泉不可挹，酒盡空石窖。古人飄何之，唯有風竹鬧。行行
翫村落，戶戶懸網罩。民風坦和平，開戶夜無鈔。叢林富

笋茹平野絕虎豹嗟哉此樂鄉無乃姜子教

寄題清溪寺

在峽州鬼谷子之故居

口舌安足恃韓非死說難自知不可用鬼谷乃真奸遺
書今未亡小數不足觀秦儀固新學見利不知患嗟時
無桓文使彼二子顛死敗無足怪夫子固使然君看巧
更窮不若愚自安遺宮若有神頷首然吾言

荆門惠泉

泉源從高來走下隨石脈紛紛白沫亂隱隱蒼崖圻紫

回成曲沼清澈見肝膈衆瀉為長溪奔駛蕩蛙烟初開
不容椀漸去已如帛傳聞此山中神物懶一作頻遭謫不能致
雷雨灑灑吐寒碧遂令山前人千古灌稻麥



東坡全集卷二十六